

Na osnovu člana 23. Ustava Bosansko-podrinjskog kantona Goražde (“Službene novine Bosansko-podrinjskog kantona Goražde”, br. 8/98,5/03), na prijedlog Vlade Bosansko-podrinjskog kantona Goražde, Skupština Bosansko-podrinjskog kantona Goražde, na sjednici održanoj _____. godine, **donosi:**

ZAKON

O PRIPADNOSTI JAVNIH PRIHODA U BOSANSKO-PODRINJSKOM KANTONU GORAŽDE I FINANSIRANJU BOSANSKO-PODRINJSKOG KANTONA GORAŽDE

I - OPĆE ODREDBE

Član 1.

Ovim zakonom uređuje se pripadnost javnih prihoda koji su ustanovljeni zakonima na teritoriji Bosansko-podrinjskog kantona Goražde i odnosi u oblasti sistema finansiranja Ustavom utvrđenih funkcija Bosansko-podrinjskog kantona Goražde i općina u sastavu Bosansko-podrinjskog kantona Goražde (u daljem tekstu: Kanton).

Član 2.

Javnim prihodima, u smislu ovog zakona, smatraju se indirektni porezi, direktni porezi, naknade, takse, doprinosi, novčane kazne, donacije i drugi prihodi, utvrđeni zakonima i drugim propisima Bosne i Hercegovine, Federacije Bosne i Hercegovine, Kantona i općina u sastavu Kantona.

Član 3.

Javni prihodi, u smislu ovog zakona, raspoređuju se Kantonu i općinama i služe za finansiranje funkcija Kantona i općina u sastavu Kantona.

Raspoređivanje ovih sredstava utvrđuje se i iskazuje u Budžetu Bosansko-podrinjskog kantona Goražde i budžetima općina.

II - PRIPADNOST JAVNIH PRIHODA U KANTONU

Član 4.

Kantonu pripadaju sljedeći javni prihodi:

1. udio indirektnih poreza sa Jedinственог računa u skladu sa Zakonom o pripadnosti javnih prihoda u Federaciji Bosne i Hercegovine ("Službene novine Federacije BiH", broj: 22/06, 43/08, 22/09)
2. porez na dobit koji su uplatila sva pravna lica na području Kantona izuzev preduzeća, banaka i dugih finansijskih organizacija, društava za osiguranje i reosiguranje imovine i lica, pravnih lica, iz oblasti elektroprivrede, pošte, telekomunikacija i pravnih lica iz oblasti igara na sreću i zabavnih igara kojima je to jedina djelatnost.
3. 65,54% poreza na dohodak uplaćenog u Kantonu
4. porez na imovinu
5. porez na naslijeđe i poklon
6. porez na promet nepokretnosti i prava
7. naknade i takse u skladu sa kantonalnim propisima
8. novčane i druge kazne po kantonalnim propisima
9. prihodi od prirodnih dobara u vlasništvu kantona
10. prihodi od korištenja ili prodaje kantonalne imovine,
11. donacije i namjenske dotacije,
12. drugi prihodi predviđeni zakonima i drugim propisima Federacije Bosne i Hercegovine i Kantona.

Prihodi koje organi i institucije Kantona ostvare svojom djelatnošću, prihod su Budžeta Kantona.

Član 5.

Općinama u sastavu Kantona pripadaju sljedeći javni prihodi:

1. udio indirektnih poreza sa Jedinственог računa u skladu sa Zakonom o pripadnosti javnih prihoda u Federaciji Bosne i Hercegovine ("Službene novine Federacije BiH", broj: 22/06, 43/08, 22/09)
2. 34,46% poreza na dohodak uplaćenog u općini.
3. 100% naknada po osnovu korištenja i uređenja zemljišta,
4. naknade i takse u skladu sa općinskim propisima
5. novčane i druge kazne u skladu sa općinskim propisima
6. prihodi od prirodnih dobara u vlasništvu općine
7. prihodi od korištenja ili prodaje općinske imovine,
8. donacije i namjenske dotacije,
9. drugi prihodi predviđeni zakonima i drugim propisima Federacije Bosne i Hercegovine, Kantona i općine.

Prihodi koje organi i institucije općine ostvare svojom djelatnošću, prihod su budžeta općine.

Član 6.

Općinama pripadaju prihodi od komunalnih taksi te prihodi od administrativnih taksi koje su plaćene za spise i radnje kod općinskih službi za upravu

Član 7.

Općinama se ustupa dio izvornih prihoda Kantona ostvarenih na nivou svake općine, kako slijedi:

1. 50% poreza na dobit koji su uplatila sva pravna lica na području Kantona izuzev preduzeća, banaka i dugih finansijskih organizacija, društava za osiguranje i reosiguranje imovine i lica, pravnih lica, iz oblasti elektroprivrede, pošte, telekomunikacija i pravnih lica iz oblasti igara na sreću i zabavnih igara kojima je to jedina djelatnost.
2. 50 % poreza na imovinu
3. 50 % poreza na naslijeđe i poklon
4. 50 % poreza na promet nepokretnosti i prava.

Član 8.

Općinska vijeća donose propise kojima se utvrđuje visina naknada po osnovu korištenja i uređenja zemljišta, kao i visina drugih naknade, novčanih kazni i taksi u njihovoj nadležnosti i na drugi način osiguravaju potrebno finansiranje.

III - FINANSIRANJE KANTONA

Član 9.

Iz Kantonalnog budžeta finansiraju se:

1. Skupština Kantona,
2. Vlada Kantona,
3. Kantonalna ministarstva i drugi organi kantonalne uprave,
4. Kantonalni i općinski sudovi,
5. Kantonalno tužilaštvo,
6. Kantonalno pravobranilaštvo,
7. Ustanove i institucije koje osniva Kanton, u skladu sa aktom o njihovom osnivanju
8. Kantonalne robne rezerve,
9. Zdravstvena zaštita,
9. Osnovne škole,
10. Srednje škole,
11. Visoko obrazovanje,
12. Stipendiranje nadarenih učenika i studenata, pomoć u stručnom usavršavanju u oblastima koje su od posebnog značaja za Kanton i u kojima postoji kadrovski deficit,
13. Razvoj nauke i naučnih institucija od značaja za Kanton

14. Podrška inovatorima,
15. Ustanove iz oblasti kulture u skladu sa kantonalnim propisima,
16. Kulturne, sportske i druge javne manifestacije od značaja za Kanton i čiji su organizatori ili pokrovitelji organi Kantona,
17. Manifestacije međunarodne i međuregionalne saradnje,
18. Udruženja građana čija je programska djelatnost od značaja za Kanton,
19. Finansiranje socijalne i zdravstvene zaštite u skladu sa zakonom,
20. Ostvarivanje prava iz oblasti boračko-invalidske zaštite u skladu sa kantonalnim propisima
21. Izgradnja, rekonstrukcija, održavanje, zaštita i upravljanje putevima iz nadležnosti Kantona,
22. Potrebe iz oblasti šumarstva, vodoprivrede i veterinarstva,
23. I druge potrebe utvrđene planovima rashoda Kantona.

Član 10.

U Budžetu Kantona će se po propisanoj metodologiji utvrditi iznos i namjena sredstava za svakog budžetskog korisnika i ostale koji se finansiraju iz sredstava Budžeta Kantona.

Član 11.

Sredstva za robne rezerve Kantona, osiguravaju se u skladu sa važećim propisima koji regulišu tu materiju.

Član 12.

U Budžetu Kantona osiguravaju se sredstva za finansiranje i drugih obaveza, potreba i zadataka koje u skladu sa Ustavom i kantonalnim zakonima finansira Kanton.

Član 13.

Iz općinskog budžeta finansiraju se:

1. Općinska vijeća,
2. Općinski načelnik, općinske službe za upravu i drugi organi i tijela općine,
3. Općinska pravobranilaštva,
4. Ustanove i institucije koje osniva općina u skladu sa aktom o njihovom osnivanju
5. Vatrogasna djelatnost,
6. Općinske robne rezerve,
7. Mjesne zajednice,
8. Predškolski odgoj,
9. Lokalna infrastruktura,
10. Posebne namjene za oblike socijalne zaštite, zaštite civilnih žrtava rata i zaštite porodice sa djecom koje utvrđuje općina svojim propisom,
11. Udruženja i općinske organizacije od općinskog značaja,
12. Sport od interesa za općinu,
13. Kultura od interesa za općinu,
14. Druge potrebe utvrđene planovima rashoda općina.

Član 14.

Nadzor nad provođenjem ovog Zakona vrši Ministarstvo za finansije Bosansko-podrinjskog kantona Goražde.

IV - PRELAZNE I ZAVRŠNE ODREDBE

Član 15.

Danom stupanja na snagu ovog zakona prestaje se primjenjivati Zakon o raspoređivanju javnih prihoda u Bosansko-podrinjskom kantonu Goražde i finansiranju Bosansko-podrinjskog kantona Goražde ("Službene novine Bosansko-podrinjskog kantona Goražde", br. 6/98,15/01).

Izuzetno, prihodi od zaostalih obaveza po osnovu poreza i naknada koje su nastale na osnovu zakona čija je primjena prestala prije stupanja na snagu ovog zakona a koje uključuju i reprogramirane obaveze, utvrđene obaveze u postupku prinudne naplate i obaveze utvrđene u inspekcijskoj kontroli raspoređivat će se u skladu sa Zakonom o raspoređivanju javnih prihoda u Bosansko-podrinjskog kantona Goražde i finansiranju Bosansko-podrinjskog kantona Goražde ("Službene novine Bosansko-podrinjskog kantona Goražde", br. 6/98,15/01).

Član 16.

Ovaj zakon stupa na snagu osmog dana od dana objavljivanja u "Službenim novinama Bosansko-podrinjskog kantona Goražde", a primjenjivat će se od 01.01. 2010. godine.

**S K U P Š T I N A
BOSANSKO – PODRINJSKOG
KANTONA GORAŽDE**

**PREDSJEDAVAJUĆI
SKUPŠTINE**

dr. Alija Begović

Broj: 01 - _____/09.

_____2009.godine.

G O R A Ž D E

O b r a z l o ž e n j e

Zakona o pripadnosti javnih prihoda u Bosansko-podrinjskom kantonu Goražde i finansiranju Bosansko-podrinjskog kantona Goražde

I – USTAVNI OSNOV

Ustavni osnov za donošenje Zakona o pripadnosti javnih prihoda u Bosansko-podrinjskom kantonu Goražde i finansiranju Bosansko-podrinjskog kantona Goražde sadržan je u glavi III i IV Ustava BPK Goražde («Sl.novine BPK Goražde» br. 8/98 i 5/03»).

II - RAZLOZI ZA DONOŠENJE ZAKONA

Razlog za donošenje Zakona o pripadnosti javnih prihoda u Bosansko-podrinjskom kantonu Goražde i finansiranju Bosansko-podrinjskog kantona Goražde je neophodnost da se nakon reforme sistema indirektnog oporezivanja i prenošenja nadležnosti za indirektno oporezivanje sa entiteta na državu, te nakon reforme sistema direktnog oporezivanja koja je nakon toga provedena na nivou Federacije BiH, na odgovarajući način utvrdi odnos i način raspodjele javnih prihoda na području Bosansko-podrinjskog kantona Goražde i odnosi sistema finansiranja Ustavom utvrđenih funkcija Kantona i općina na području Kantona.

III – VAŽNIJA ZAKONSKA RJEŠENJA

Poglavlje I – sadrži Opće odredbe.

Poglavlje II – sadrži odredbe kojima se utvrđuje pripadnost javnih prihoda na području Kantona. U ovom poglavlju je utvrđeno koji prihodi pripadaju Kantonu a koji općinama u sastavu kantona, te koje prihode i u kojem omjeru Kanton ustupa općinama

Poglavlje III- sadrži odredbe o finansiranju ustavom utvrđenih funkcija Kantona odnosno općina na području Kantona.

Poglavlje IV- sadrži prelazne i završne odredne.

IV – FINANSIJSKA SREDSTVA

Za provođenje ovog zakona nisu potrebna dodatna finansijska sredstva.

**Bosna i Hercegovina
Federacija Bosne i Hercegovine
Bosansko – podrinjski kanton Goražde
VLADA KANTONA**

Z A K O N

**O PRIPADNOSTI JAVNIH PRIHODA U
BOSANSKO – PODRINJSKOM KANTONU GORAŽDE I
FINANSIRANJU BOSANSKO – PODRINJSKOG KANTONA
GORAŽDE**

Goražde, oktobar 2009.godine.

